

四庫全書

子部

欽定四庫全書

冊府元龜卷三百五十六 宋 王欽若等 撰

將帥部

立功第九

隋李雄初仕後周太祖時為輔國將軍從達奚武平漢  
中定興州又討汾州叛胡錄前後功拜驃騎大將軍儀  
同三司

竇榮定初仕周為平東將軍從太祖與齊人戰於北却

周師不利榮定與汝南公宇文神慶帥精騎二千邀擊之齊師乃郤以功拜上儀同

元景山仕周閔帝時從大司馬賀蘭祥擊吐谷渾以功拜撫軍將軍其後與齊人戰於北邙斬級居多高祖受禪拜上柱國明年大舉伐陳以景山為行軍元帥率行軍總管韓延呂哲出漢口遣上開府鄧孝儒將勁卒四千攻陳甑山鎮陳人遣其將陸綸以舟師來援孝儒逆擊破之陳將魯達陳紀以兵守涓口景山復遣兵擊走之

陳人大駭甌山沌陽二鎮守將皆棄城而遁

宇文欣年十八歲從周齊王憲討突厥有功拜儀同三司韋孝寬之鎮玉壁也以欣驍勇請與同行屢有戰功加位開府驃騎將軍從武帝伐齊遂拔晉陽齊平進位大將軍又從韋孝寬討尉遲迴迴遣子惇盛兵武陟欣先鋒擊走之進臨相州迴遣精甲三千伏於野馬岡欲擊官軍欣以五百騎襲之斬獲畧盡進至草橋迴又拒守欣率奇兵擊破之直趨鄴下

李衍仕周武帝時為義州刺史從韋孝寬鎮玉壁城數  
與賊戰敵人憚之及平齊以軍功進授大將軍後為定  
鄜二州刺史及王謙作亂高祖以行為行軍總管從梁  
睿擊車之進位上大將軍

于繭仕周武帝時為少胥附從齊王憲破齊師於雒陽  
以功賜爵豐寧縣子邑五百戶

趙仲卿周大將軍綱之子從齊王憲擊北齊攻臨秦統  
戎威遠伏龍張辟等五城盡平之又擊齊將段孝先於

姚襄城苦戰連日破之以功授大都督尋典宿衛平齊之役以功遷上儀同兼趙郡太守開皇中拜朔州總管會突厥啓人可汗求婚於國帝許之仲卿因是間其骨肉遂相攻擊十七年啓人窘迫與隋使長孫晟投通漢鎮仲卿率騎千餘馳援之達頭不敢逼潛遣人誘致啓人所部至者二萬餘家其年從高颺指白道以擊達頭仲卿率兵三千為前鋒至族蠡山與虜相遇交戰七日大破之追奔至乞伏泊復破之虜千餘口雜畜萬計突

厥悉衆而至仲卿為方陣四面拒戰經五日會高頴大  
兵至合擊之虜乃敗走追度白道踰泰山七百餘里時  
突厥降者萬餘家帝命仲卿處之常安以功進位上柱  
國賜物三千段朝廷慮達頭掩襲啓人令仲卿屯兵二  
萬以備之代州總管韓洪永康公李藥王蔚州刺史劉  
隆等將步騎一萬援常安達頭騎十萬來寇韓洪軍大  
敗仲卿自樂寧邀擊斬首虜千餘級

楊素仕周武帝時為車騎大將軍從齊王憲與齊人戰

於河陰以功封清河縣子邑五百戶及高祖為丞相素  
深自結納高祖甚嘉之以素為汴州刺史行至雒陽會  
尉遲迥作亂榮州刺史宇文胄據武牢以應迥素不得  
進高祖拜素大將軍發河內兵擊胄破之遷徐州總管  
及伐陳為行軍元帥率水兵東下陳主遣其信州刺史  
顧覺鎮安蜀城荊州刺史陳紀鎮公安皆懼而退走巴  
陵以東無敢守者湘州刺史岳陽王陳叔慎遣使請降  
又為內史令以浙江賊帥高智慧等未殄復乘傳至會



稽先是泉州人王國慶南安豪族也殺刺史劉弘據州為亂諸亡賊皆歸之自以海路艱阻非北人所習不設備素汎海掩之王國慶惶遽棄州而走餘黨散入海島或守溪洞素分遣諸將水陸追捕乃密令人謂國慶曰爾之罪狀計不容誅唯有斬送智慧可以塞責國慶於是執送智慧斬於泉州自餘支黨悉來降附江南大定後遷尚書左僕射時漢王諒反帝以素為荊州道行軍總管河北道安撫大使率衆數萬討諒時晉絳莒三州

並為諒城守素各以二十石縻之而去諒遣趙子開擁  
衆十餘萬策絕徑路屯據高壁布陣五十里素令諸將  
以兵臨之自引奇兵潛入霍山緣崖谷而進直指其營  
一戰破之殺傷數萬諒所署介州刺史梁脩羅屯介休  
聞素至懼棄城而走進至并州三十里諒率其將王世  
宗趙子開蕭摩訶等衆且十萬來拒戰又擊破之擒蕭  
摩訶諒退保并州素進兵圍之諒窮蹙而降餘黨悉平  
韓擒虎仕周武帝時為儀同三司齊將獨孤永業守金

墉城擒虎說下之進平范陽加上儀同陳人逼光州擒  
虎以行軍總管擊破之又從宇文欣平合州高祖作相  
遷利州刺史陳將甄慶任蠻奴蕭摩訶等共為聲援頻  
寇江北前後入界擒虎屢挫其鋒陳人奪氣伐陳之役晉  
王遣行軍總管杜彥與擒虎合軍步騎二萬陳叔寶遣  
領軍蔡徵守朱雀航聞擒虎將至衆懼而潰任蠻奴為  
賀若弼所敗棄軍降於擒虎擒虎以精騎五百直入朱  
雀門陳人欲戰蠻奴搗之曰老夫尚降諸君何事衆皆

散走遂平金陵

達奚長孺仕周武帝時為行軍總管北巡沙塞卒與虜  
遇接戰大破之

李徹仕周為車騎大將軍從武帝破齊師於汾北乘勝  
下高壁拔晉陽擒高楷於冀州俱有力焉錄前後功加  
開府別封蔡陽縣公邑千戶

崔仲方仕周為平東將軍從武帝攻北齊晉州齊亞將  
崔景嵩請為內應仲方與段文振等登城應接遂下晉

州文令仲方說翼城等四城下之授儀同開皇末為會  
州總管時諸羌猶未賓附詔令仲方擊之與賊三十餘  
戰紫祖四隣望方涉題千碇小鐵圍山白男王弱水等  
諸部悉平賜奴婢二百三十口黃金三十斤雜物稱是  
段文振仕周為中外府兵曹從武帝攻北齊晉州下之  
進拔文侯華谷高壁三城皆有力焉及攻并州陷東門  
而入齊安德王延宗懼而出降開皇末為太僕卿越雋  
蠻叛擊平之賜奴婢二百口大業初為兵部尚書從征

吐谷渾督兵屯雪山連營三百餘里東接楊義臣西連張壽合圍渾主於覆袁川以功進位右光祿大夫

李崇周武帝時為將兵都督隨宇文護伐齊功最擢授儀同三司

權武仕周為開府武帝時從王謙破齊服龍等五城增邑八百戶平齊之役攻陷邵州別下六城以功增邑三百戶

郭衍仕周為儀同大將軍從武帝與齊主大戰於晉州

追齊師至高壁敗之仍從平并州以功加授開府封武強縣公累遷右中軍熊渠中大夫尉遲迴之起逆韋孝寬戰於武陟進戰於相州迴遣弟子勤為青州總管率青齊之衆來助迴迴敗勤與迴子惇祐等欲東奔青州衍將精騎一千追破之執祐於陣勤遂遁走而惇亦逃逸衍至濟州入據其城又擊其餘黨於濟北累戰破之執送京師超授上柱國封武山郡公開皇中從晉王出鎮揚州江表構逆命行為總管領精銳萬人先屯京口

於貴洲南與賊戰敗之生擒魁帥大獲舟楫糧儲以克  
軍實仍討東陽永嘉宣城黥歛諸洞盡平之授蔣州刺

史

李禮成仕周武帝時為車騎大將軍伐齊之役禮成從  
帝圍晉陽以兵擊南門齊席毗羅率精甲數千拒帝禮  
成力戰退之加開府封冠軍縣公

李子雄仕周武帝時從平齊以功授帥都督高祖作相  
從韋孝寬破尉遲迴於相州拜上開府伐陳之役以功



進位大將軍漢王諒之亂煬帝以子雄為上大將軍發  
幽州兵三萬自井陘以討諒時諒遣大將軍劉建畧地  
燕趙正攻井陘相遇於抱犢山下力戰破之遷幽州總

管

李景仕周武帝時平齊之役頗有力焉授儀同三司後  
平尉遲迥進位開府開皇九年以行軍總管從王世積  
伐陳陷陣有功進位開府及高智慧等作亂江南復以  
行軍總管從楊素擊之別平倉嶺還授鄜州刺史開皇

末從史萬歲擊突厥於大斤山別路邀賊大破之大業  
初擊叛蠻向思多破之又擊吐谷渾於西海攻高麗武  
厲城皆破之

薛世雄年十七歲從周武帝平齊以功拜帥都督開皇  
時數有戰功累遷儀同三司右親衛車騎將軍煬帝嗣  
位番禺夷獠相聚為亂詔世雄討平之

賀若誼仕周武帝時為雒州刺史北齊范陽王高紹義  
之奔突厥也誼以兵追之戰於馬邑遂擒紹義以功進

位大將軍高祖為丞相拜亳州總管馳驛之部西過司馬消難東拒尉遲迴中州刺史李慧反誼討平之進爵范陽郡公授上大將軍

梁士彥仕周為東南道行臺使持節徐州總管三十二州諸軍事徐州刺史與烏丸軌擒陳將吳明徹裴忌於呂梁別破廣陵畧定淮南地高祖作相轉亳州總管二十四州諸軍事尉遲迴之反也以為行軍總管從韋孝寬擊之至河陽與迴軍相對令家僮梁點等數人為前

鋒士彥以其徒繼之所當皆破乘勝至草橋迴衆復合  
進戰大破之及圍鄴城攻北門而入馳啓西門納宇文  
欣之兵及迴平除相州刺史

杜彥仕周武帝時為左侍上士後從柱國陸通擊陳將  
吳明徹於土州破之又擊叛蠻尅倉槌白楊二柵並斬  
其渠帥進平郢州賊帥樊志以戰功拜大都督高祖為  
丞相從韋孝寬擊尉遲迴於相州每戰有功開皇中為  
左武衛將軍平陳之役以行軍總管與新義公韓擒虎

相繼而進軍至南陵賊屯據江岸彥遣儀同樊子蓋率精兵擊破其柵獲船六百餘艘渡江擊南陵城拔之擒其守將許翼進至新林與擒虎合軍及平陳進位柱國時高智慧等之作亂也復以行軍總管從楊素討之別解江州圍智慧餘黨往往屯聚保投溪洞彥水陸兼進攻錦山陽父若石壁西洞悉平之皆斬其渠帥賊李陀擁衆數千據彭山彥襲擊破之斬陀傳其首又擊徐州宜豐二洞悉平之

和洪仕周武帝時數從征伐烏丸軌之擒陳將吳明徹也洪有功焉加位開府遷折衝中大夫尉遲迥作亂相州以洪為行軍總管從韋孝寬擊之軍至河陽迥遣兵圍懷州洪與總管宇文述等擊走又破尉惇於武陟及平相州每戰有功拜柱國封廣武郡公邑二千戶

劉方仕周武帝時為承御上士以戰功拜上儀同高祖為丞相方從韋孝寬破尉遲迥於相州以功加開府賜爵河陰縣侯仁壽中交州俚人李佛子亂方為交州總

管至都隆嶺遇賊二千餘人來犯官軍方遣營主宋纂何  
貴嚴願等擊破之進兵臨佛子先令人諭以禍福佛子  
懼而降送於京師其有桀黠者恐於後為亂皆斬之尋  
授驩州道行軍總管以尚書右丞李綱為司馬經畧林  
邑方遣欽州刺史寧長真驩州刺史李暈上開府秦雄  
以步騎出越常方親率大將軍張孫司馬李綱舟師趨  
北景大業元年正月軍至海口林邑王梵志遣兵守險  
方擊走之師次閣梨江賊據南岸立柵方盛陳旗幟擊

金鼓賊懼而潰既渡江行三十里賊乘巨象四面而至  
方以弩射象中瘡却蹂其陣王師力戰賊奔於柵因攻  
破之俘馘萬計於是濟區粟渡六里前後逢賊每戰  
必擒進至大緣江賊據嶮為柵又擊破之過馬援銅柱  
南行八日至其國都林邑王梵志棄城奔海獲其廟主  
金人汗其宮室刻石紀功而還

楊文思任周為儀同三司從武帝攻拔北齊晉州以勲  
進授上儀同三司壽陽劉叔仁作亂從清河公宇文神



舉討之戰於博井在陣生擒叔仁後從王誼破賊於鯉魚柵其後累以軍功遷果毅右旅下大夫高祖為丞相文思從韋孝寬拒尉遲迴於武陟迴遣其將李雋圍懷州與行軍總管宇文述擊走之破尉遲惇平鄴城皆有功進授上大將軍

崔弘度仕周為上開府宣帝嗣位從鄖國公韋孝寬經畧淮南弘度與化政公宇文欣司水賀婁子幹至肥口陳將潘深率兵數千來拒戰隔水而陣欣遣弘度諭以

禍福深至夕而遁攻壽陽降陳守將吳之立弘度功最以前後勲進位上大將軍

于顛仕周為郢州刺史宣帝時為水軍總管從韋孝寬經畧淮南顛率開府元紹貴上儀同毛猛等以舟師自潁口入淮陳防主潘深棄柵而走進與孝寬攻拔壽陽復引師圍硤石守將許約懼而降顛乃拜東廣州刺史後拜吳州總管陳將錢茂和率數千人襲江陽顛逆擊走之陳復遣將陳紀周羅暉燕合兒等襲顛顛拒之而

退

馮昱仕周宣帝時以行軍總管與王誼李威等討叛蠻  
平之拜柱國

王誼仕周為邠州總管司馬消難舉兵反高祖以誼為  
行軍元帥率四總管討之軍次近郊消難懼而奔陳于  
時北至商洛南拒江淮東西二千餘里巴蠻多叛共推  
渠帥蘭雒州為主雒州自號河南王以附消難北連尉  
遲迥誼率行軍總管李威馮暉李遠等分討之旬月皆

平

韋藝任周為魏郡太守高祖為丞相尉遲迴陰圖不軌  
朝廷遣藝季父孝寬馳往伐迴藝因投孝寬即從孝寬  
擊迴以功進位上大將軍

李穆仕周宣帝時為大左總管尉遲迴之亂令其所署  
行臺韓長業攻陷雒州執刺史趙署城民郭子勝為刺  
史穆遣兵討之獲子勝高祖嘉之以穆勞效同破鄴城  
第一勲加三轉聽分授其二子榮才及兄賢子孝軌榮

及才並儀同大將軍孝軌進開府儀同大將軍又別封其子雄為密國公邑三千戶

韓僧壽任周宣帝時為侍伯中旅下大夫從韋孝寬平尉遲迥每戰有功授大將軍封昌樂公邑千戶

韋洸任周宣帝時為開府高祖為丞相洸從季父孝寬擊尉遲迥於相州以功拜柱國進封襄陽郡公開皇初突厥寇邊皇太子屯咸陽令洸統兵出源州道與虜相遇擊破之拜江陵總管伐陳之役領行軍總管及陳平

拜江州總管率步騎二萬畧定九江遂進圖嶺南高祖  
與書慰勉之洸至廣州嶺表皆降之帝聞而悅許以便  
宜從事洸所統集二十四州拜廣州總管

高頴仕周宣帝時為開府擊尉遲迥既至軍為橋於沁  
水賊於上流縱大棧頴預為木狗以禦之既度焚橋而  
戰大破之遂至鄴下與迥交戰仍共宇文忻李詢等設  
策因平尉遲迥及突厥犯塞以頴為元帥擊賊破之又  
出白道進圖入磧破賊而還

元褒仕周為趙州刺史褒從韋孝寬擊尉遲迥以功超拜柱國

乞伏慧仕周為飲飛右旅熊渠中大夫從韋孝寬擊尉遲惇於武陟所當皆破授大將軍

田仁恭仕周為大將軍從韋孝寬破尉遲迥於相州拜柱國

樊叔畧仕周為營構監尉遲迥之亂高祖令叔畧鎮大梁迥將宇文威來寇叔畧擊走之以功拜大將軍

宇文述仕周為英果中大夫尉遲迥作亂相州述以行軍總管率步騎三千從韋孝寬擊之軍至河陽迥遣將李雋攻懷州述別擊雋軍破之又與諸將擊尉遲惇於永橋述先鋒陷陣俘馘甚衆平尉遲迥每戰有功超拜上柱國開皇初拜右衛將軍平陳之役以行軍總管率衆三萬自六合而濟時韓擒虎賀若弼兩軍趣丹陽述進據石頭城為聲援陳主既擒而蕭瑛蕭巖據東吳之地擁兵拒守述領行軍總管元契張黥言等討之水陸



兼進落叢公燕榮以舟師自海至亦受述節度陳永新  
侯陳君範自晉陵奔璪并軍合勢見述軍且至璪懼立  
柵於晉陵城東又絕塘道留兵拒述璪自義興入太湖  
圖掩述後述進破其柵廻兵擊璪大敗之斬璪司馬曹  
勒义前軍復陷吳州璪以餘衆保包山燕榮擊破之述  
進至奉公埭蕭巖陳君範等以會稽請降述許之二人  
面縛路左吳會悉平以功拜安州總管大業中為左衛  
大將軍從煬帝幸榆林時鐵勒契弊歌稜攻敗吐谷渾

其部攜散遂遣使請降求救帝令述以兵屯西平之臨  
羌城撫納降附吐谷渾見述擁強兵懼不敢降遂西遁  
述領鷹揚郎將梁元禮張峻崔師等追至曼頭城攻拔  
之斬三千餘級乘勝至赤水城復拔之其餘黨走屯丘  
尼川述進擊大破之獲其王公尚書將軍二百人前後  
虜男女四千口而還渾主南走雪山其故地皆亡明年  
從帝西巡至金山登燕支述每為斥侯時渾賊復寇張  
掖進擊走之明年帝有事遼東與將軍楊義臣率兵復

臨鴨綠水會楊玄感作亂帝詔述班師令馳驛赴河陽發諸郡兵以討玄感時玄感逼東都聞述軍將至懼而西遁前圖關中述與刑部尚書衛玄左禦衛將軍來護兒武衛將軍屈突通等躡之至閩鄉五丈原與玄感相及述與來護兒列陣當其徑道屈突通以奇兵擊其後大破之遂斬玄感傳首行在所賜物數千段

梁睿任周為涼安二州總管及高祖總百揆代王謙為益州總管行至漢川而謙反遣兵攻始州睿不得進高

祖命睿為行軍元帥率行軍總管于義張威達奚長儒  
梁昇石孝義步騎二十萬討之時謙遣開府李三王守  
通谷睿使張威擊破之擒數千人進至龍門謙將趙儼  
秦會擁衆十萬據嶮為營周亘三十里睿令將士啣枚  
自開遠道西南奮擊力戰破之蜀人大駭睿鼓行而進  
謙將敬豪守劔閣梁巖拒平林並懼而來降又令高阿  
那環達奚碁等以盛兵攻利州聞睿將至碁分兵據開  
遠睿顧謂將士曰此虜據要欲遏吾兵勢吾當出其不

意破之必矣遣上開府拓拔宗超劔閣大將軍宇文曼  
指巴西大將軍趙達水軍入嘉陵睿遣張威王倫賀若  
震于義韓相貴阿那惠等分道攻碁自午及申破之碁  
奔歸于謙睿進逼成都謙令達奚碁乙弗虔城守親率  
精兵五萬背城結陣睿擊之謙不利將入城碁虔以城  
降拒謙謙將麾下三十騎遁走新都令王寶執之睿斬  
謙於市劔南悉平進位上柱國

于義仕周宣帝時為開府高祖作相王謙構逆其將達

奚基擁衆據開遠義以都督將左軍擊破之拜潼州總管

李憚仕周為義州刺史王謙作亂以行軍總管從梁睿擊平之進上大將軍開皇元年以行軍總管討平叛蠻進位柱國

長孫熾仕周為大都督王謙作亂熾從信州總管王長述沂江而上以熾為前軍破謙一鎮定楚合等五州擒偽總管荆山公元振以功拜儀同三司大業初擢拜戶

部尚書吐谷渾寇張掖令熾率精騎五千擊走之追至青海而還以功授銀青光祿大夫

楊文紀開皇初為車騎大將軍儀同三司安州總管長史將兵迎陳降將李瑗於齊安與陳將周法尚軍遇擊走之以功進授開府

張翁開皇初為大都督領鄉兵賀若弼之鎮壽春也嘗為間諜平陳之役頗有功焉進位開府儀同三司又率水軍破逆賊笮子游於京口薛子建於和州拜大將軍

後從楊素征江表別破高智慧於會稽吳世華於臨海  
進位上大將軍

龐晃開皇初為上開府拜右衛將軍河間王弘之擊突  
厥也晃以行軍總管從至馬邑別路出賀蘭山擊賊破  
之斬首千餘級

權武開皇六年為大將軍檢校潭州總管桂州人李世  
賢作亂武以行軍總管與武侯大將軍虞慶則擊平之  
王劼開皇中以行軍總管屯兵江北禦陳寇數有戰功



為陳人所憚伐陳之役及高智慧反攻討皆有殊績官  
至柱國

趙賢通開皇中為民部中大夫從上柱國于義率衆數  
萬自三鵝道以伐陳寇剋陳十九城而還

賀若弼開皇中為行軍總管伐陳之役進屯蔣山之白  
土岡陳將魯達周智安任蠻奴田瑞樊毅孔範蕭摩訶  
等以勁兵拒戰田瑞先犯弼擊走之魯達等相繼遁進  
弼軍屢却弼揣知其驕士卒且惰於是督厲將士殊死

戰遂大破之

劉權開皇中為車騎將軍從晉王瑋平陳以功進授開府儀同三司大業五年從征吐谷渾權率衆出伊吾道與賊相遇擊走之逐北至青海虜獲千餘口

王世積開皇中為蘄州總管平陳之役晉王已平丹陽世積於是移書告諭遣于全公權始璋畧取新蔡陳江州司馬黃偲棄城而遁始璋入據其城世積繼至陳豫章太守徐澄廬陵太守蕭廉海陽太守陸仲容巴山太

守王誦太原太守馬頓齊昌太守黃正始安城太守任  
瓘等及鄱陽臨川守將並詣世積降以功進位柱國荆  
州總管桂州人李光仕作亂世積以行軍總管討平之  
進位上柱國

高勵開皇中以行軍總管從宜陽公王世積下陳江州  
以功拜上開府

周法尚開皇中為黃州總管伐陳之役以行軍總管隸  
秦孝王率舟師三萬出于樊口陳城州刺史熊門超出

師拒戰法尚擊破之擒超於陣累遷永州總管安集嶺南未幾桂州人李光仕舉兵作亂令法尚與上柱國王世積討之法尚馳往桂州發嶺南軍世積出岳州徵嶺北軍俱會于尹州光仕來逆擊走之世積所部多遇瘴不能進頓於衡州法尚獨討之光仕帥勁兵保白石洞法尚捕得其弟光畧光度大獲家口其黨有來降附法尚輒以妻子還之居旬日降者數千人法尚遣兵列陣以當光仕親率奇兵蔽林設伏兩陣始交法尚馳擊其柵

柵中人皆走散光任大潰追斬之拜武衛將軍時黔安夷向思多反殺將軍鹿愿圍太守蕭造法尚與將軍李景分路討之法尚擊思多于清江破之斬首三千級還從討吐谷渾法尚別出松州道逐捕亡散至于青海遼東之役以舟師指朝鮮道會楊玄感反與將軍宇文述來護兒等破之以功進右光祿大夫時有齊郡人王薄孟讓等舉兵為盜衆十餘萬保長白山頻戰每挫其銳燕榮開皇中為青州總管伐陳之役以為行軍總管率

水軍自東萊傍海入太湖取吳郡既破丹陽吳人共立  
蕭獻為主阻兵於晉陵為宇文述所敗退保包山榮率  
精甲五千躡之獻敗走為榮所執晉陵會稽悉平

李元通開皇中以尚書左丞領左翊衛驃騎將軍伐陳  
之役元通以行軍總管從楊素出信州道以功進位大  
將軍

劉仁恩開皇中以行軍總管從楊素伐陳與素破陳將  
呂仲肅於荆門仁恩之計居多授上大將軍

來護兒開皇中為大都督平陳之役護兒有功進位上  
開府從楊素擊高智慧于浙江智慧將逃於海護兒追  
至閩中餘黨皆平進位大將軍除泉州刺史封襄陽縣  
公食邑一千戶時智慧餘黨盛道延阻兵為亂護兒又  
討平之遷建州總管又與蒲山公李寬討平黔歙逆黨  
汪文進進位柱國大業中遼東之役護兒率樓船指滄  
海入自溟水去平壤六十里與高麗相遇進擊大破之  
乘勝直造城下破其郭郭於是縱軍大掠稍失部伍高

元弟建武募敢死士五百人邀擊之護兒因却屯營海浦以待期會後知宇文述等敗遂班師明年又出滄海道師次東萊會楊玄感作逆黎陽進逼鞏雒護兒勒兵與宇文述等擊破之封榮國公又帥師渡海至卑奢城高麗來戰護兒大破之斬首千餘級

魚俱羅開皇中以大都督從晉王平陳有功拜開府未幾沈玄愔高智慧等作亂江南楊素以俱羅同行每有戰功加上開府又從素出靈州道擊突厥以功進位柱



國大業中以交通內臣除名會越雋飛山蠻作亂詔俱  
羅白衣領將并率蜀郡都尉段鍾葵討平之

冊府元龜卷三百五十六

欽定四庫全書

冊府元龜卷三百五十七 宋 王欽若等 撰

將帥部

立功第十

隋史萬歲開皇中為左領軍將軍先是南寧夷爨翫來降拜昆州刺史既而復叛遂以萬歲為行軍總管率衆擊之入自蜻蛉川經弄凍次小勃弄大勃弄至於南中賊前後屯據要害萬歲皆擊破之行數百里見諸葛亮

紀功碑銘其背曰萬歲之後勝我者過此萬歲令左右  
倒其碑而進渡西洱河入渠濫川行千餘里破其三千  
餘部虜獲男女二萬餘口諸夷大懼遣使請降獻明珠  
徑寸於是勒美隋德

蘇孝慈開皇中檢校利州總管事從史萬歲擊西爨累  
戰有功進位大將軍尋檢校益州總管長史會越嶲人  
王奉舉兵作亂沙羅從段文振討平之

楊武通開皇中以行軍總管討西南夷以功封白水郡

公

張須陁開皇中從史萬歲討西爨以功授儀同煬帝嗣位漢王諒作亂并州從楊素平之加開府大業中為河南道黜陟討捕使賊帥盧明月衆十餘萬將寇河北須陁邀擊殺數千人賊呂明星帥仁參霍小漢等衆各萬餘擾濟北須陁進軍擊走之

慕容三藏開皇中為吳州刺史副襄陽公韋洸討嶺南酋長王仲宣既至廣州洸中流矢卒詔三藏檢校廣州

道行軍事賊衆四面攻圍三藏固守月餘城中糧少矢盡三藏以為不可持久遂自率驍銳夜出突圍擊之賊衆敗廣州獲全以功授大將軍

陰壽開皇中為幽州總管先是高寶寧者北齊之疎屬也為人傑黠有籌筭在齊久鎮黃龍及齊滅周武帝拜為營州刺史甚得華夷心高祖為丞相遂連結契丹靺鞨舉兵反高祖以中原多故未遑進討以書諭之而不得開皇初又引突厥攻圍北平至是令壽率步騎數萬

出盧龍塞以討之寶寧求救於突厥時衛王爽等諸將  
數道北征突厥不能援寶寧棄城奔於磧北黃龍諸縣  
悉平

張衡開皇中以行軍總管率步騎五萬人討熙州賊李  
英林平之拜開府

房兆開皇中為行軍總管擊胡以功官至柱國徐州總  
管

賀婁子幹開皇中為行軍總管時吐谷渾復寇邊西土

多被其害命幹討之馳驛至河西發五州兵入掠其國  
殺男女萬餘口二旬而還

梁遠開皇中為汶州總管吐谷渾寇邊遠以銳卒擊之  
斬千餘級

元諧開皇中為大將軍總兵討吐谷渾時賊將定城王  
鍾利旁率騎三千渡河連結党項諧率兵出鄯州趨青  
海邀其歸路吐谷渾引兵拒諧相遇於豐利山賊鐵騎  
二萬與諧大戰諧擊走之賊駐兵青海遣其太子可博

汗以勁騎五萬來掩官軍詰逆擊敗之追奔三十餘里  
俘斬萬計虜大震駭

周羅睺開皇末為幽州刺史突厥達頭可汗犯塞從楊  
素擊之虜衆甚盛羅睺白素曰賊陣未整請擊之素許  
焉與輕勇三十騎直衝虜陣從申至酉短兵屢接大破  
之進位大將軍

王仁恭開皇末為車騎將軍從楊素擊突厥於靈武以  
功拜上開府後為驃騎將軍典蜀王軍事山獠作亂蜀



王命仁恭討破之煬帝嗣位漢王諒舉兵反從楊素擊平之以功進位大將軍遼東之役以仁恭為將軍明年至新城賊數萬背城結陣仁恭率勁騎一千擊破之賊嬰城拒守仁恭四面攻圍帝聞而大悅遣舍人詣軍勞問賜以珍物進授光祿大夫

董純開皇末為左衛將軍漢王諒作亂為行軍總管從楊素擊平之以功拜柱國後為榆林太守會彭城賊帥張大彪宗世模等衆至數萬保懸薄山寇掠徐兗煬帝

令純討之純初閉營不與戰賊屢挑之不出賊以純為怯不設備縱兵大掠純選精銳擊之合戰於昌慮大破之斬首萬餘級築為京觀賊魏騏驎衆萬餘人據單父純進擊又破之帝征遼復以純為彭城留守東海賊彭孝才衆數千掠懷仁縣純擊擒之

何稠開皇末為員外散騎侍郎桂州李光仕聚衆為亂詔稠討之賊相繼降分遣建州開府梁昵討叛夷羅壽羅州刺史馮暄討賊帥李大壇並平之傳首軍門承制

署首領為州縣官而還

李渾仁壽初為象城府驃騎將軍從左僕射楊素為行軍總管出夏州北三百里破突厥阿勿俟斤於納遠川斬首五百級進位大將軍

郭榮仁壽初為通州刺史西南夷獠多叛詔榮領八州諸軍事行軍總管率兵討之歲餘悉平煬帝即位入為武侯驃騎將軍後數歲黔安首領田羅駒阻清江亂夷陵諸郡民夷多應者詔榮擊平之遷左侯衛將軍

吐萬緒仁壽末為太子左虞侯率煬帝嗣位漢王諒時  
鎮并州帝恐其為亂拜緒晉絳二州刺史馳傳之官緒  
未出關諒已遣兵據蒲坂斷河橋緒不得進詔緒率兵  
從楊素擊破之拜左武侯將軍劉元進作亂江南以兵  
攻潤州帝徵緒討之緒率衆至楊子津元進自茅浦將  
渡江緒勒兵擊走緒因濟江背之為柵明日元進來攻  
又大挫之賊解潤州而去緒進屯曲阿元進復結柵拒  
緒挑之元進出戰陣未整緒以騎突之賊衆遂潰赴江

水而死者數萬元進挺身夜遁歸保其偽署僕射朱燮  
管崇等屯於毘陵連營百餘里緒乘勢進擊復破之賊  
退保黃山緒進軍圍之賊窮蹙請降元進朱燮僅以身  
免於陣斬管崇及其將軍陸顛等五千餘人收其子女  
三萬餘口送江都宮進解會稽圍

史祥仁壽末為行軍總管漢王諒之亂祥擊其將余公  
理大破之專趣黎陽討慕容良慕容良棄軍走其衆大潰進  
位上大將軍

王辨仁壽末為車騎將軍漢王諒之亂辨從楊素討平之累遷鷹揚郎將遼東之役以功加通議大夫山東盜賊起上谷魏刀兒自號歷山飛衆十餘萬劫掠燕趙詔辨發步騎三千擊敗之其後賊帥郝孝德孫宣雅時季康竇建德魏刀兒等往往屯聚大至十萬小至數千寇掠河北辨進兵擊之所往皆捷

趙才煬帝大業中以行軍總管從征吐谷渾才與衛尉劉權兵部侍郎明雅等出合阿道與賊相遇擊破之以

功進位金紫光祿大夫

裴仁基大業中為武賁郎將從將軍李景討叛蠻向思多於黔安以功進銀青光祿大夫又擊吐谷渾於張掖破之

陳稜大業中為武賁郎將與朝請大夫張鎮周發東陽兵擊琉球國分為五軍趨其都邑其王歡斯渴刺兜率衆數千逆拒稜遣張鎮周為先鋒擊走之稜乘勝逐北至其柵渴刺兜背柵而陣稜盡銳擊之從辰至未苦鬪不

息渴刺兜自以軍疲引入柵稜遂填塹攻破其柵斬渴  
刺兜獲其子烏搥虜男女數千而歸進位右光祿大夫  
遼東之役以宿衛遷左光祿大夫明年帝復征遼東稜  
為東萊留守楊玄感之作亂也稜率衆萬餘人擊平黎  
陽斬玄感所署刺史元務本尋奉詔於江南營戰艦至  
彭城賊帥孟讓聚衆將十萬據都梁宮阻淮為固稜潛  
於下流而濟至江都率衆襲讓破之以功進位光祿大  
夫賜爵信安侯後帝幸江都宮而李子通據海陵左才相



掠淮北杜佛威屯六合衆各數萬帝遣稜率宿衛兵擊之往往尅捷超拜右御衛將軍

楊義臣大業中為左光祿大夫從煬帝征遼東時渤海高士達清河張金稱並相聚為盜衆已數萬攻陷郡縣帝遣將軍段達討之不能尅詔義臣率遼東還兵數萬擊之大破士達斬金稱又收合降賊入豆子豆討格謙擒之以狀聞奏帝惡其名遽追入朝賊繇是復盛義臣以功進位光祿大夫

元成壽大業中為左親衛郎將楊玄感之亂也從刑部尚書衛玄擊之以功進位正議大夫拜西平通守

斛斯萬善大業中從衛玄討楊玄感頻戰有功及玄感敗走萬善與數騎追及之玄感窘迫自殺繇是知名

王世克大業中為江都守時厭次人格謙為盜數年兵十餘萬在豆子航中世克帥師破斬之威振羣賊又擊盧明月破之於南陽斬首數萬虜獲極多後還江都帝大悅自執杯酒以賜之

唐張鎮周初仕隋為武賁郎將大業中汎海擊琉球國破之遷左衛將軍從帝江都於上江督運賊董道冲為阻進擊破之

屈突通任隋大業中為左驍衛大將軍時秦隴盜賊蜂起以通為關內討捕大使有安定人劉迦論舉兵反據雕陰郡僭號建元署百官有衆十餘萬稽胡首領劉拔真劉鷄子聚衆與迦論相影響通發關中兵擊之賊衆大潰斬迦論并首級萬餘於上郡南山築為京觀虜男

女數萬口而還後從太宗圍雒陽竇建德且至太宗中  
分麾下以屬通令與齊王元吉圍守雒陽世克平通功  
為第一

劉德威仕隋大業末以校尉從左光祿大夫裴仁基討  
賊于淮左手斬魁帥李青蛙傳首行在所武德初為潞  
州道行軍總管領兵出太行山經畧河內仍受太宗節  
度德威進兵拔懷州從擒竇建德平王世充皆有功

蘭謀仕隋大業末以鷹揚將軍留守臨汾義旗建率所

部來降從高祖平京城授左光祿大夫為太子左衛率  
又從太宗破宋金剛及王世充竇建德劉黑闥徐圓朗  
等皆有戰勲數蒙賞賜

李藝任隋大業末為幽州總管及聞高祖踐祚奉表歸  
國於是璽書封王會劉黑闥舉兵高祖遣其弟監門將  
軍壽將兵與藝合勢攻劉黑闥藝率步騎數萬破劉什  
善於徐河又進兵與太宗軍會於洛水太宗令為馬軍  
總管仍領本兵從大軍擊賊有功武德三年竇建德侵

幽州藝為總管擊走之斬首千餘級

藺興粲為驍騎將軍武德元年梁師都寇靈州興粲擊破之俘斬二千餘人鄜州刺史梁禮叛擊破之俘斬千餘人

張綸以左驍騎衛將軍為絳州道行軍總管武德元年討叛胡平之

鮮于盛為統軍武德元年王世充將高毗侵壽安盛斬首千餘級

趙欽為驃騎武德元年賊帥呂寶生衆七千人破蓋屋  
縣欽擊之斬首百餘級

王師仁為討捕使武德元年胡賊八千人掠涇陽師仁  
擊走之

王君廓武德初以上柱國從大軍東討別下輜轅羅州  
二縣王世充遣將魏隱率兵拒之君廓撤營偽遁設伏  
以待之隱縱兵疾進發伏大破之又與諸軍下武牢執  
偽荆王行本擊王世充糧運於緱氏沉其米船三十餘

艘進爵彭國公邑三千戶

黃君漢武德初為行軍總管鎮于柏崖拒王世克將高  
毗敗之封虢國公後從太宗擊東都別下回洛城及東  
都平賜黃金百兩雜綵千餘段從平劉黑闥及破輔公  
柘皆有戰功

丘行恭武德初以光祿大夫從太宗討薛舉劉武周王  
世克竇建德皆立殊勲授左驃騎貞觀中從侯君集平  
高昌封天水郡公



裴行方武德初為右親衛中郎將從征遼東授右五步  
軍總管破駐蹕山攻安市城有功授右衛將軍又奉詔  
討茂州叛羌董郎弄大破之窮賊餘黨西至乞習山臨  
弱水而歸

馬三寶武德初以別擊叛胡劉拔真於北山破之又從  
平薛舉遷左驍衛大將軍復從柴紹擊吐谷渾於岷州  
先鋒陷陣斬其名王前後虜男女數千口以功封新興  
縣侯

李大亮武德初為金州總管府司馬時王世克遣其兄子弘烈據襄陽令大亮安撫樊鄧以圖進取亮進兵擊之所下十餘城高祖下書勞勉後從太宗討吐谷渾為河東道行軍總管遇賊於蜀渾山破之俘其名王虜雜畜五萬以功進爵為公

殷嶠武德初以陝東道行臺兵部尚書從討宋金剛與總管衛孝節將軍秦武通別破賊將尉遲敬德於美良川拜吏部尚書以功進爵鄆國公食邑三千戶

盧士良武德初以戰功為柱國其後黨弘仁督運於穀州士良以馬軍總管率兵為援遇王世充驍將葛彥璋接戰破之進下慈潤城擒其守張曉復從平宋金剛

劉弘基武德初以秦王府左一總管從太宗屯于拍壁率兵二千自隰州趣西河斷賊歸路時賊鋒甚勁弘基堅壁不敢進及金剛遁弘基率騎趣之至于介休與太宗會追擊大破之貞觀中為輔國大將軍遼東之役以弘基為前軍大將軍從擊高延壽於駐蹕山力戰有功

累蒙優賞

公孫武達武德初為秦王府長鎗車騎從太宗討劉武周力戰功最後為右監門將軍合擊鹽州叛突厥可邏拔扈武達引兵趨靈州至波邏迴及之賊方渡河見武達至據河南岸與武達相持武達泊船引兵擊之斬可邏拔扈殺傷幾盡進封東萊郡公

盛彥師武德初以行軍總管與史萬寶鎮宜陽以拒東寇斬李密擒王伯當以功封葛國公拜武衛將軍

秦叔寶武德初以馬軍總管從太宗北征於美良川破尉遲敬德功最居多尋授秦王府右三統軍從破宋金剛於介休從討王世克每為先鋒又從平劉黑闥累授上柱國左武衛將軍封翼國公

程知節武德初以秦王府左三統軍破宋金剛擒竇建德降王世克並領左一馬軍總管每陣先登以功封宿國公顯慶初為葱山道行軍總管與賀魯所部歌邏祿及處月戰於榆暮谷大破之斬首千餘級獲駝馬牛羊

萬計副將周智度攻其突騎處木昆等於咽城拔之斬首三萬級虜獲甚衆

張士貴武德初為光祿大夫累有戰功賜爵新野縣公從太宗平東都授虢州刺史貞觀七年以右武侯將軍破反獠而還

段志玄武德初以光祿大夫從劉文静拒屈突通於潼關以功授樂遊府驃騎將軍後從討王世克破竇建德功又居多遷秦王府右三護軍

段德操以武衛將軍為延州道行軍總管武德二年梁師都侵延州德操擊破之斬首三十餘級五年擊師都石堡大破之俘斬千餘人師都僅以身免

李靖武德二年以秦王幕府從討王世克以功授開府時蕭銑據荊州遣靖安輯之輕騎至金州遇蠻賊數萬聚山谷靖與廬江王瑗擊之多所克獲會開府蠻酋冉肇則反率眾寇夔州趙郡王孝恭與戰不利靖率眾八百襲破其營臨陣斬肇則俘獲五千餘人四年以行軍

總管攝孝恭行軍長史集兵於夔州討蕭銑破之以功授上柱國封永康縣公十六年輔公祐反於丹陽靖又副孝恭以討平之貞觀三年突厥諸部離叛朝廷將圖進取以靖為代州道行軍總管率驍騎三千自馬邑出其不意直趣惡陽嶺以逼之四年二月次陰山擊頡利可汗大破之滅其國復定襄常安之地斥土界自陰山北至於大漢露布以聞

李仲文為行軍總管武德三年劉武周遣將軍張萬歲



侵涪州仲文擊走之俘斬數千人

郭行方為襄州道安撫使武德四年攻蕭銑郢州尅之  
九年為益州刺史行臺高書擊眉州叛獠之衆大破之  
李勣武德四年以陵州刺史從太宗伐王世克于東都  
累戰大捷又東畧地至武牢偽鄭州司兵沈悅請翻武  
牢勣夜潛兵應接尅之擒其偽刺史荆王行本從太宗  
振旅而還論功行賞太宗為上將勣為下將與太宗俱  
服金甲乘戎輅告捷於太廟又從太宗破劉黑闥徐圓

朗累遷左監門大將軍圓朗重據兗州反授勅河南大  
總管以討之尋獲圓朗斬首以獻七年詔與趙郡王孝  
恭討輔公祏孝恭領舟師巡江而下勅領步卒一萬渡  
淮拔其壽陽至硤石公祏之將陳正通率兵十萬屯于  
梁山又遣其大將馮惠亮率水軍十萬鑿連大艦以斷  
江路仍於江西結壘分守水陸以禦王師勅攻其壘尋  
尅之惠亮單艘而遁乘勝逼之正通大潰以十餘騎奔  
于丹陽公祏棄城夜遁勅縱騎追斬之於武康江南悉

定太宗即位拜并州都督賜實封九百戶貞觀三年為  
通漠道行軍總管至雲中與突厥頡利可汗兵會大戰  
于白道突厥既敗屯營于磧口遣使請和詔鴻臚卿唐  
儉往赦之勅時與定襄道大總管李靖軍會與議曰頡  
利雖敗人衆尚多若走渡磧保于九姓道徑阻深追則  
難及今詔使唐儉至彼其必弛備我等隨後襲之此不  
戰而平賊矣靖扼腕喜曰公之所言乃韓信滅田榮之  
策也於是定計靖將兵逼夜而發勅勒兵徑進靖軍既

至賊營大潰頡利與萬餘人欲走渡磧勣屯軍於磧口頡利至不得渡磧其大酋長率其部落並降于勣虜五萬餘口而還勣為并州大都督長史十五年徵拜兵部尚書未赴京會薛延陀遣其子大度設帥騎八萬南侵李思摩部落命勣為朔州行軍總管率輕騎三千追及延陀於青山擊大破之斬其名王一人俘獲首虜五萬餘計以功封一子為縣公十九年太宗親征高麗授勣遼東道行軍大總管攻破蓋年遼東白崖數城以功封一

子為郡公高宗總章元年為遼東道行軍大總管率兵平高麗加太子太師增食實封通前一千一百戶

李安遠武德中為左武衛將軍破宋金剛王世克擒劉黑闥皆有戰功

尉遲敬德武德中以秦王府左一統軍從太宗擊王世克大破之又從討劉黑闥於臨洛敬德率壯士犯圍而入大破賊陣已又從破徐圓朗累有戰功授秦王府左二副護軍武德末以行軍總管與突厥戰於涇陽大破

之獲其侯斤阿史德烏沒啜斬首千餘級

許紹武德中以硤州刺史為行軍總管時蕭銑屢遣兵入硤州紹擊走之進圍安蜀鎮副將朱士陸殺其大將率士衆來降於紹紹又遣子智仁及裨將李弘節攻荆門鎮破之

柴紹武德中以左翊衛大將軍從太宗平薛舉破宋金剛攻平王世克於雒陽擒竇建德於武牢封霍國公賜實封千二百戶九年為左衛大將軍擊突厥於秦州大

破之斬其特勒一擒大將三人斬首千餘級

竇軌武德中以光祿大夫鎮秦州會赤排羌作亂軌與康州刺史楊師道擊破之餘黨悉降後率兵擊東都高

祖引其將校五百人宴賜而遣之及還鎮于益州許以

便宜從事時巴隆等數州

隆今閬州

山獠作亂軌擊破之還

至方山羣獠潛相聚結夜襲軌營軌逆擊之戰數合賊始敗前後虜男女二萬口又屬党項寇松州詔軌援之又令扶州刺史蔣善合與軌合勢時党項引吐谷渾之

衆其鋒甚銳軌等分軍於宕昌岷山二道俱進軌師未  
至善合先期至錯川遇賊力戰走之高祖因令軌耀兵  
於臨洮首首王子貢等詐降於軌收而斬之進擊左封  
破其部衆

錢九隴武德中為左監門郎將平薛仁杲劉武周以前  
後戰功累授右武衛將軍其後從太宗擒獲竇建德平  
王世克從隱太子討劉黑闥於魏州力戰破賊策勳為  
最累封郟公仍以本官為死遊將軍



盧祖尚武德六年以兗州刺史從趙郡王孝恭討輔公  
柝為前軍總管攻其宣歙二州克之進擊賊帥馮慧亮  
陳正通並破之賊平以功授蔣州刺史

張公謹太宗貞觀初以代州都督副李靖經畧突厥破  
定襄破頡利璽書慰勞封鄒國公

蘇定方為正道府折衝貞觀初隨李靖襲突厥頡利於  
磧口靖使定方率二百騎為前鋒乘霧而行去賊一里  
許忽然霧散望見其牙帳馳掩殺數十百人頡利及隋

主狼狽散走餘衆俯伏靖軍既至遂悉降之軍還授左  
武衛中郎將永徽中以左衛中郎將從左衛大將軍程  
知節征賀魯有功擢為行軍大總管率兵盡平西域生  
擒賀魯而還顯慶五年授熊津道大總管率兵討平百  
濟定方前後滅三國皆生擒其主賞賜珍寶不可勝紀  
薛萬徹貞觀初為柴紹之副擊梁師都于朔方會突厥  
四面而至官軍稍却萬徹與兄萬均橫出擊之斬其騎  
將虜陣既亂因而乘之殺傷被野鼓行而進遂圍師都


降其城後從李靖擊突厥頡利可汗於塞北以功授統  
軍及靖將擊吐谷渾請萬徹同行與諸將各率百餘騎  
先行卒與虜數千騎相遇萬徹單騎馳擊之虜無敢當  
還謂諸將曰賊易與耳躍馬復進諸將隨之斬數千級  
又與兄萬均破吐谷渾天柱王於赤水源獲其雜畜二  
十萬計萬均官至左屯衛大將軍封潞國公萬徹後為  
蒲州刺史會薛延陀率廻紇同羅之衆渡磧南擊李思  
摩萬徹副李勣援之與虜相遇率數百騎先鋒擊其陣

後騎皆散退賊顧見遂大潰追奔數十里斬首三千餘級獲馬萬五千匹以功別封一子縣侯後為青丘道行軍大總管率甲士二萬自萊州泛海伐高麗入鴨綠水百餘里至泊沔城高麗震懼多棄城而遁泊沔城主所夫孫帥步騎萬餘人拒戰萬徹遣右衛將軍裴行方領步卒為支軍繼進萬徹及諸軍乘之賊大潰追奔百餘里於陣斬所夫孫進兵圍泊沔城其城因山設險阻鴨綠水以為固攻之未拔高麗遣將高文率烏骨安地諸城

兵三萬餘人來援分置兩陣萬徹分軍以當之鋒刃纔接而賊大潰

張儉貞觀初以軍功累遷朔州刺史後為檢校營州都督府事營州所管契丹奚靺鞨諸蕃皆隣接境粟末靺鞨最近高麗引衆數千來寇儉率鎮兵及諸蕃首領邀擊之斬獲畧盡璽書慰勞拜營州都督及行軍總管征遼東時有獲高麗侯者稱莫離支將至遼東詔儉率兵新城路邀莫離支竟不敢出儉因進兵渡遼趨建安

城賊徒大潰斬首數千級以功累封皖城郡公賞賜甚厚



冊府元龜卷三百五十七

欽定四庫全書

子部

冊府元龜卷三百五十八

詳校官中書臣羅錦森

侍讀臣孫球覆勘

總校官庶吉士臣何思鈞

校對官助教臣蔡鎮

謄錄監生臣張仲芳



欽定四庫全書

冊府元龜卷三百五十八

宋 王欽若等 撰

將帥部

立功第十一

唐張寶相為大同道行軍副總管貞觀四年寶相獲頡利可汗於塞表其沙鉢羅設蘇尼失以餘衆舉國來降牛進達為鄴江府統軍貞觀七年陵嘉二州獠反令進達率衆往擊破之尋拜左武衛將軍又二十一年從征

高麗至駐蹕山與司徒長孫無忌率軍出自賊後先後奮擊大破之師旋拜左武衛大將軍又與右武衛將軍李海岸等浮海以伐高麗襲破石城虜男女數百人進次稽利城高麗列陣來戰進達擊之斬首二千餘級張士賓為行軍總管貞觀八年討東西王洞反僚平之姜確為左屯衛將軍貞觀中高昌之役以為交河道行軍副總管率眾數千先大軍出伊吾趣柳谷依山採木造攻城器械其地有班超紀功碑確磨去文刊頌國威

而去遂與侯君集等滅高昌力戰有功軍還封金城郡  
公食邑二千戶

劉師立為岷州都督貞觀中河西党項丑氏常為邊患  
又阻新附奉詔擊破之丑氏大懼遁於山谷師立至邨  
于真山與吐谷渾相遇擊破之多所虜獲而還

張士貴貞觀中為屯衛大將軍時薛延陀犯塞士貴督  
夏州騎士倍道邀擊大破之

契苾何力為左領軍將軍貞觀中與將軍薛萬均征吐

谷渾萬均為賊所攻何力救之獲免時吐谷渾主在突  
倫川何力復欲襲之萬均懲其前敗固言不可何力曰  
賊非有城郭逐水草以為生若不襲其不虞便恐鳥驚  
魚散一失機會安可傾其巢穴耶乃自領驍兵千餘騎  
直入突倫川襲破吐谷渾牙帳斬首數千級獲駝馬牛  
羊二十餘萬頭渾主脫身以免俘其妻子而還後為右  
驍衛大將軍永徽二年弓月處密叛以何力為弓月道  
大總管討平之擒其渠帥處密時健侯斤等以歸乾封

元年又為遼東道行軍大總管兼安撫大使高麗有衆十五萬屯於遼水又引靺鞨數萬據南蘇城何力奮擊皆大破之斬首萬餘級乘勝而進凡拔七城乃迴軍會英國公李勣於鴨綠水共攻辱夷大行二城破之勣頓軍於鴨綠柵何力引蕃漢兵五十萬先臨平壤勣仍繼至拔平壤城執男建虜其王還

席君買為果毅都尉貞觀十五年率精騎百二十襲擊吐谷渾之丞相宣王破之斬其弟兄三人

初丞相宣王專其國權陰

謀作難詐言祭山神乃結人仗將襲弘化公主劫其王  
詰曷鉢等奔于吐蕃期有日矣詰曷鉢知而大懼率輕  
騎走鄯城所部咸信王以兵迎之君買除其害國人仍  
相驚擾詔遣戶部尚書唐儉中書舍人馬周持節慰撫  
之其衆乃安

郭孝恪為安西都護貞觀十八年詔孝恪討焉耆乃選  
步騎三千出銀山道以焉耆王弟粟婆淮為鄉道焉耆  
所都城四面有水自恃其甲不虞於我孝恪倍道兼行  
夜至城下潛遣將士浮水而渡及明一時攀堞鼓角齊  
震城中大擾孝恪縱兵擊之虜其王突騎支斬首虜七

千級以粟婆淮為軍導有功留攝國事而還時屈利啜  
將兵來援馬耆以勁騎五千追孝恪至於銀山之下孝  
恪逆擊破之追奔數十里而還

田仁會為左武侯中郎將貞觀十八年太宗征遼發後  
薛延陀數萬騎抄掠河內帝令仁會及執失思力率兵  
擊破之逐北數百里延陀脫身走免帝嘉其功降璽書  
慰勞

楊弘禮為兵部侍郎貞觀十九年從太宗征遼領馬步

二十四軍出其不意以擊之所向摧破二十一年  
為崑丘道副大總管軍將咸受節度於是破處  
月降處密殺焉耆王降馭支部獲龜茲於闐王  
凱還

喬師望為夏州都督貞觀二十年與右領軍大將軍執  
失思力等擊薛延陀大破之斬獲二千餘人

梁建方為右武侯將軍貞觀二十二年擊松外蠻破之  
初雋州都督劉伯英上言松外諸蠻雖暫降欵旋即背



叛請出師討之西洱河天竺道可通也由是建方發蜀  
州十二州兵討之蠻帥雙舍率眾拒戰建方擊破之殺  
獲千餘人羣蠻震擾各竄山谷建方分遣使者說以利  
害爭來款附前後至者七十餘部戶十萬九千三百建  
方署其首領蒙和為縣令各統所部莫不感悅建方乘  
勝遣使往西洱河其帥楊盛見使至大駭具船將遁使  
者曉諭禍福示以威信盛遂稽顙請降遣首領十人來  
謁軍門建方振旅而還及至太宗勞其勤老賜以上駟

趙孝祖為朗州道總管高宗永徽三年大破白水蠻其地與青蛉弄棟相接酋長楊承顛私自署侵陵隣境朗州都督任懷王屢招懷之承顛不從攻劫尤數及孝祖軍至夷人多棄城投險惟小勃弄酋長師盛守白旗城率步騎一萬逆戰孝祖破之斬師盛首進至大勃弄承顛嬰城自固孝祖遣人招之承顛大罵無禮孝祖進軍攻之臨陣獲承顛餘衆走險往往屯聚大者數萬小者數千人孝祖與戰皆破降之西南夷遂定

程名振為營州都督兼東夷都護顯慶二年率兵破高麗於貴端水焚其新城殺獲甚衆

薛仁貴為左領軍郎將顯慶二年詔副程名振於遼東經畧大破高麗於貴端水焚其新城斬三千級龍朔元年授左武威衛將軍封河東縣男其後破九姓從李勣平高麗皆有大功

劉仁軌為檢校帶方州刺史兼熊津道行軍長史顯慶五年大軍征遼仁軌仍別領水軍二萬襲破倭賊數萬

於白江虜掠船艦四百餘艘倭賊及耽羅等國皆遣使  
詣之請降初仁執將發帶方州謂人曰天將富貴此翁  
耳於州司請歷日一卷并七廟諱人怪其故答曰擬削  
平遼海頒示國家正朔使夷俗尊奉焉至果以軍功顯  
正除帶方州刺史又檢校熊津都督總知留鎮兵馬事  
咸亨五年為雞林道大總管東伐新羅仁執徑度瓠蘆  
河破其北方大鎮七重城以功進爵為公并子姪三人  
並授上柱國州黨榮之

高侃為東州道行軍總管左監門大將軍咸亨三年與高麗餘衆戰於白水山大破之時新羅還將救高麗以拒官軍侃與副將李謹行等引兵迎擊高麗斬首三千級

李謹行為燕山道總管右領軍大將軍咸亨四年大破高麗叛徒於靺廬河之西俘獲數千人自是平壤餘衆走投新羅

黑苗常之為左領軍員外將軍儀鳳中吐蕃入寇從河

西道大總管李敬玄拒之總管劉審禮之沒於陣敬玄欲抽軍却阻泥溝而計無所出常之夜率敢死五百人進斫賊營賊酋跋地設棄軍宵遁高宗大悅擢授左武衛將軍永隆二年為河源道經畧大使率兵以討吐蕃軍至良非川吐蕃大將贊婆引退常之進軍追討獲其羊馬甲仗而還垂拱三年八月突厥骨咄祿元珍寇朔州常之為燕山道大總管擊賊於黃花堆大破之追奔四十餘里遂散走磧北

裴行儉為定襄道行軍大總管調露二年大破突厥於黑山擒其首領奉職偽可汗泥熱匐為其下所殺斬其首來降

竇懷哲為益州都督調露二年突厥餘衆圍雲州懷哲與左領軍中郎將程務挺率兵擊破之

程務挺為右衛將軍封平原郡公永淳二年綏州城平縣人白鐵餘率部落稽之黨據縣城反偽稱尊號署百官又進寇綏德殺掠人吏焚燒村落務挺與夏州都督

王方翼討之務挺進攻其城拔之生擒白鐵餘盡平其餘黨又以功拜左驍衛大將軍

李孝逸為玉鈴衛大將軍則天文明元年李敬業據揚州亂詔孝逸討破之斬首七千級投于谿水死者數千追奔二十餘里敬業窘急與其弟敬猷及唐之竒杜求仁駱賓王等輕騎遁走至江都攜其妻子奔潤州又將逃入海投于高麗孝逸乘勝進據揚州分遣將士捕之敬業至海陵界阻風頓於灘上其偽將王那相斬敬業



及敬猷賓王而降傳其首於東都求仁之奇等咸赴水而死揚潤楚三州悉平

馬敬臣為揚州道副總管文明元年李敬業據揚州亂敬臣與賊帥尉遲昭戰于都梁山斬之盡降其衆

魏元忠為侍御史李敬業於揚州作亂元忠督軍征之敬業平授司刑正

王果為廣州都督垂拱元年討嶺外反獠平之

王孝傑為武威軍總管長壽元年與阿史那忠節大破

吐蕃克復龜茲于闐疎勒碎葉等四鎮

唐休璟為隴右諸軍大使久視元年吐蕃贊普遣將麴莽布支寇涼州圍逼昌松縣休璟與莽布支戰于洪源谷斬其副將二人獲首二千五百級

陳大慈為都督長安二年十月吐蕃贊普率眾萬餘人寇悉州大慈與賊四戰皆破之斬首千餘級

唐九徵為姚雋道討擊使中宗神龍三年擊姚州叛蠻敗之俘虜三千餘級遂樹碑以紀功焉

郭虔瓘為右衛將軍北庭都護玄宗開元二年突厥默  
啜遣其子同俄特勒率眾寇北庭虔瓘擊敗之斬同俄  
於城下突厥女壻火拔頡利發石阿失畢與同俄特勒  
同領兵同俄之死懼不敢歸遂與其妻歸降虔瓘以破  
賊功拜冠軍大將軍行右驍衛大將軍封太原郡開國  
公

郭知運為伊吾軍使開元二年副郭虔瓘破突厥於北  
庭以功封介休縣公擢拜右武衛將軍其年秋吐蕃入

寇知運與薛納王峻等犄角擊敗之拜知運鄯州都督隴右諸軍節度大使四年冬突厥降戶阿悉爛跌跌思素等率衆反詔知運領朔方兵橫擊之大破賊衆於黑山呼延谷六年又率兵入討吐蕃賊徒無備遂掩至九曲獲鎧甲及馬羊牛等數萬計拜知運為兼鴻臚卿御史中丞八年六州胡康待賓反詔知運與王峻討平之拜左武衛大將軍

阿史那獻為北庭大都護瀚海軍使開元二年梟突厥

都擔首獻于闕下并擒其孥及胡祿等部落五萬餘帳  
內屬

王峻為隴右郡牧使開元二年攝右羽林將軍薛訥邀  
擊吐蕃至武衛谷去大來谷二十里為賊所隔峻率兵  
迎訥之軍賊置兵於兩軍之間連亘數十里峻夜出壯  
士銜枚擊之賊大潰乃與訥合軍掩其餘衆追奔至洮  
水殺獲不可勝數盡收所掠牧馬而還以功加銀青光  
祿大夫封清源縣男兼源州都督其後降虜復叛勅峻

帥并州兵西濟河以討之殺一千五百餘人生獲一千四百餘人馳馬牛羊甚衆以功遷散騎常侍持節朔方道行軍大總管

孫仁獻為松州都督開元四年大破吐蕃于城下初仁獻率驍勇候夜掩入賊營亂斫之賊震栗奔散乃以刀斫馬脚而大潰帝聞之特命御史就松州錄其勞降書慰勞仁獻及將吏

張說為并州大都督開元九年胡賊康待賓率衆反據

長泉縣自稱葉護攻陷蘭池等六州詔王峻率兵討之  
仍令說相知經畧時叛胡與黨項連結攻銀城連谷以  
據倉糧說統馬步萬人出合河關掩擊大破之追至駱  
駝堰胡及黨項自相殺阻夜胡乃西遁入鐵建山餘黨  
潰散說招集黨項復其居業其年拜兵部尚書同中書  
門下三品十年為朔方軍節度大使時康待賓餘黨慶  
州方渠降胡康願子自立為可汗舉兵反謀掠監牧馬  
西涉河出塞說進兵討擒之并獲其家屬於木盤山送

京都斬之其黨悉平

張嵩為北庭節度使開元十年九月吐蕃圍小勃律王沒謹忙求救于嵩曰勃律之國是漢西門漢若失之則已西諸國並陷吐蕃矣都護其若之何嵩方開葱嶺既聞之許諾報曰國家西岳久被聲教王忠勤之至貫於神明何彼犬戎敢此凌侮嵩忝司鎮禦必不容縱當整師徒為王翦滅謹忙大喜嵩乃遣疏勒副使張思禮率蕃漢馬步四千人赴援晝夜倍道兼進謹忙復乘勢出



兵左右夾攻吐蕃大破殺其衆數萬收其器械羊馬等甚衆盡復其九城之胡初勃律王來朝上字之為子於其國置綏遠軍以地隣吐蕃常為所困吐蕃每謂之曰我非謀于爾國假爾道以攻四鎮自嵩此征之後不敢西向

趙頤貞為安西副大都督開元十六年敗吐蕃於曲子城

王君奐為河西隴右節度使開元十六年吐蕃將悉諾

邏率衆入寇大小谷又移攻甘州焚燒市里而去君奭  
候其兵疲整士馬以掩其後會大雪賊徒凍死者甚衆  
賊遂取磧石軍西路而還君奭令副使馬元慶裨將軍  
李車蒙追之不及君奭先令人潛入賊境於歸路燒草  
悉諾邏還至大非山將息甲牧馬而野草皆盡馬死過  
半君奭與秦州都督張景慎等率襲其後入至青海之  
西時海水合將士並乘冰而度會悉諾邏已度大非山  
輜重及疲兵尚在青海之側君奭縱兵盡俘獲之及羊

馬數萬君奭以功遷右羽林軍大將軍

張審素為雋州都督開元十七年攻破蠻拔昆明城及  
監城殺獲萬人

王忠嗣為左威衛郎將專知行軍兵馬開元二十一年  
秋吐蕃大入忠嗣以所部策馬而前殺數百人賊衆遂  
亂三軍翼而擊之吐蕃大敗忠嗣以功最詔拜左金吾  
衛將軍天寶中累遷河東朔方節度使頻戰青海磧石  
皆大尅捷又伐吐渾於墨離虜其全國而歸

張守珪為幽州長史河北節度副大使開元二十二年發兵討契丹斬其王屈烈及其大臣可突干等傳首東都餘衆及叛奚皆散山谷立其酋長李過析為契丹王二十五年為幽州節度使破契丹餘黨於榛祿山殺獲甚衆

蓋嘉運為磧西節度使開元二十七年大破突騎施于碎葉城之東賀邏嶺擒可汗吐火仙及葉護特勒及弟撥斯獲馳馬牛羊數千計初嘉運銜命招輯突騎施拔

汗那巴西諸國會突騎施可汗蘇祿死其子吐火仙嗣  
立與葉護特勒首領都磨度竊據碎葉城又引黑姓可  
汗爾微特勒據怛邏斯城以拒官軍嘉運自率精兵攻  
碎葉與火仙接戰火仙棄旗而走遂擒之分遣疎勒鎮  
守使夫蒙靈磬統驍雄與拔汗那王俱進掩其不備遂  
入怛邏城斬可汗爾微特勒及弟撥斯其黨遂遁及入  
曳建城因收得交河公主及獲蘇祿可敦爾微可敦遂  
收諸散落百姓凡數萬人悉付拔汗那王阿悉爛達于

以歸諸國皆來降附

裴敦復為河南尹天寶三載屬狂賊吳令光扇聚兇黨於四明間據海以叛詔敦復持節率晉陵太守劉巨鱗統兵討之敦復既至江夏賊黨自潰生擒令光以獻玄宗嘉其功拜刑部尚書

王難得為金吾衛郎將天寶初以并定戎城破木柵功授威衛羽林將軍七載從哥舒翰擊吐蕃於磧石軍擒吐渾王子悉弄恭及子婿悉頰藏累拜左武衛大將軍

充關西遊奕使九載破吐蕃收其五橋又破樹敦域加  
白水軍使十三載從收九曲加特進至德中為鳳翔都  
知兵馬使難得後遇安慶緒於滄陽誘以入壁擊破之  
封瑯邪郡公

高仙芝為安西副都護四鎮都知兵馬使小勃律國王  
為吐蕃所招妻以公主西北二十餘國皆為吐蕃所制  
貢獻不通節度使田仁琬蓋嘉運夫蒙靈登累討之不  
捷天寶五載特勅仙芝以馬步萬人為行營節度往討

之自安西行十五日至撥換城三十餘日至握瑟德又  
十餘日至疎勒又二十餘日至葱嶺守捉又二十餘日  
至播密川又二十餘日至特勒滿川仙芝乃分為三軍  
使疎勒守捉趙崇玘統三千騎趨吐蕃連雲堡自北谷  
入使撥換守捉賈崇瓘自赤佛堂路入仙芝與中使邊  
令誠自護密國入約七月十三日辰時會于連雲堡遂  
登山挑擊從辰至巳大破之至夜奔逐殺四五千人生  
擒千人餘並走散得馬千餘匹軍資器械不可勝數仙



芝遂進至勃律國招諭其王并公主出降並平其國六載八月仙芝虜勃律王及公主取赤佛堂路班師制授仙芝鴻臚卿攝御史中丞代靈啓為四鎮節度使九載將兵討石國平之獲其王以歸

哥舒翰為隴右節度使先是吐蕃石堡城路遠而險久不拔天寶八載詔翰率河東西靈武及突厥阿布思等兵士六萬三千攻城拔之更名神武軍分兵鎮守翰以功拜鴻臚員外卿

李忠臣本姓董名秦天寶中歷仕幽州節度薛楚玉張  
守珪安祿山等頗征討積功勞遷折衝郎將左武衛將  
軍同正平盧軍先鋒使及安祿山反與其倫輩密議殺  
偽節度使呂知誨立劉正臣為節度使正臣以忠臣為  
兵馬使攻長楊戰獨山襲榆關北平殺賊將申子貢榮  
先欽擒周釗送京師忠臣功多又從正臣破漁陽逆將  
李歸仁李咸白秀芝等來拒戰約十合並摧破之無何  
潼關失守郭子儀李光弼退師忠臣乃引軍北歸奚王

阿篤孤初以衆與正臣合後乃言請以萬餘騎同收范陽至后城南中夜反攻正臣忠臣與戰逐至溫泉山破之擒大首領阿布離斬以祭纛釁鼓正臣卒又與衆議以安東都護王玄志為節度使至德二年正月玄志令忠臣以步卒三千自雍奴為輦筏過海賊將石帝庭烏承洽來拒忠臣與董竭忠退之轉戰累日遂收魯城河間景城等大獲資糧以赴本軍復與大將田神功率兵討平原樂安郡下之擒偽刺史臧瑜等防河招討使李銑承

制以忠臣為德州刺史屬史思明歸順河南節度張鎬  
令忠臣以兵赴鄆州與諸軍收河南州縣又與裨將楊  
惠元大破賊將王福德于舒舍口肅宗累下詔褒慰仍  
令鎮濮州尋移韋城乾元元年九月改光祿卿同正其  
年與郭子儀等九節度圍安慶緒於相州明年二月諸  
軍潰歸忠臣亦退至滎陽賊將敬釭來襲官船忠臣大  
破之獲米二百餘艘以資汴州軍士尋拜濮州刺史緣  
河守捉使移鎮杏園渡及史思明陷汴州節度使許叔

冀與忠臣並力屈降賊思明撫忠臣背曰吾比只有左手今得公兼有右手矣與俱寇河陽數日忠臣夜以五百人斫其營突圍歸光弼光弼以聞詔加開府儀同三司殿中監同正賜實封二百戶召至京師賜姓李氏名忠臣封隴西郡公賜良馬庄宅銀器綵物等時陝西神策兩節度郭英乂衛伯玉鎮陝州以忠臣為兩軍節度兵馬使魚朝恩亦在陝俾忠臣與賊將李歸仁李感義等戰於永寧莎柵前前後數十陣皆摧破之會淮西節

度王仲昇為賊所擒寶應元年七月拜忠臣太常卿同  
正兼御史中丞淮西十一州節度使尋加安州刺史仍  
鎮蔡州其年令忠臣會元帥諸軍收復東都二年六月  
就加御史中丞時迴紇可汗既歸其國留判官安恪石  
帝庭于河南守禦財物因此招聚亡命為寇道路擁隔  
詔忠臣討平之永泰元年吐蕃犯西陲京師戒嚴代宗  
命中使追兵諸道多不時赴難使至淮西忠臣方會鞠  
即令整師飾駕監軍大將固請曰軍行須擇吉日忠臣

奮臂於衆曰馬有父母遇寇難待擇好日方救患乎即  
日進發自此方隅有警忠臣必先期而至繇是代宗嘉  
其忠節加本道觀察使寵賜頗厚及同華節度周智光  
舉兵反詔忠臣與神策軍將李太清討平之大厯三年  
檢校工部尚書加實封通前三百戶五年加蔡州刺史  
七年檢校右僕射知省事李靈曜之叛田承嗣使姪悅  
援之忠臣與諸軍大破悅等汴州平

郭子儀為朔方節度兵馬使天寶十四載安祿山反詔

以子儀為衛尉卿克朔方節度使率本軍東討遂舉軍  
出單于府收靜邊軍斬賊將周萬頃傳首闕下祿山使  
大同軍使高秀巖寇河曲子儀大破之進收雲中馬邑  
開東陁以功加御史大夫十五載二月與太原節度使  
李光弼出井陘拔常山郡破史思明於九門又南拔趙  
郡生擒四千人皆捨之斬偽太守郭獻璆獲器械數十  
萬進軍而南思明以數萬衆躡其後子儀與光弼選驍  
騎五百人更挑之三日行至行唐賊疲乃退因乘之大破



於沙河會玄宗西幸於是光弼保太原子儀朝於靈武  
至德元年加武部尚書平章事賊將阿史那從禮以蕃  
虜五千騎出塞門誘河曲九蕃府六胡州部落數萬皆  
從叛子儀率諸將合擊大破之斬獲不可勝計河曲平  
子儀入塞而南收河東郡擊走偽將崔乾祐二年四月  
進位司空克關內河東副元帥是年九月副廣平王東  
征子儀率廻紇及南蠻大食之衆十五萬屯京西南隅  
陳於涑水西鎮北庭節度使李嗣業為前軍關內節度

王思禮為後軍子儀奉元帥為中軍彌亘三十里賊將李歸仁安守忠眾十萬陣於其北歸仁先薄我軍我軍將亂李嗣業前衝之殺十餘騎乃定迴紇以奇兵出其後而夾攻之賊軍大潰斬首六萬級偽將張通儒等走陝州翼日子儀整軍入京師遂收華陰弘農數日而東十月安慶緒悉師屯陝西負山為陣子儀以大軍攻其前迴紇登山乘其背遇賊潛師於山中與鬪過期大軍稍却賊分兵三千人絕我歸路眾心大搖子儀麾迴紇

令進盡殺之潛師馳至其後於黃埃中發十數矢賊驚  
顧曰迴紇來迴紇來乃大潰僵屍遍山澤遂復東都以  
功加司徒封代國公食邑千戶乾元元年九月與李光  
弼等九節度之師討安慶緒大敗之獲偽鄭王安慶和  
以獻遂收衛州廣德元年十月吐蕃陷涇州虜刺史高  
暉暉遂與蕃軍為鄉道引賊深入京畿掠奉天武功濟  
渭而南緣山而東渭北行營兵馬使呂日將逆戰于盩  
厓自辰至酉殺蕃軍數千然其徒多殞賊將逼京師代

宗計無所出遽詔子儀為關內副元師出鎮咸陽子儀自相州不利李光弼代掌兵柄及徵還朝廷部曲散去及是承詔部下唯二十騎強取民家畜產以助軍至咸陽蕃軍已過渭水其日天子避狄幸陝州子儀聞帝避狄雪涕還京至則軍駕已發射生將王獻忠從駕泂路遂以四百騎判乃逼豐王已下十王欲投於賊子儀入開遠門遇之詰豐王等所向遂護送行在子儀以三千騎傍南山至商州得武關防兵及六軍散卒四千招輯

士衆其軍漸振蕃寇犯京城得故邠王守禮孫廣武王承宏立帝號假署百官子儀遣六軍兵馬使張知節烏崇福羽林軍使長孫全緒等將兵萬人為前鋒營於韓公堆盛張旗幟鼓鞀震山谷全緒遣禁軍舊將王甫入長安陰結少年豪俠以為內應一日齊擊鼓於朱雀街蕃軍惶駭而去大將李忠義先屯兵苑中渭北節度使王仲昇守朝堂子儀以大軍續進至漉西而射生將王撫自署為京兆尹聚兵二千人擾亂京城子儀召撫殺

之詔子儀權京城留守子儀子晞少善騎射常從父以戰功授左贊善大夫又從收復二京力戰於陝西加銀青光祿大夫鴻臚卿同正叛兵殺其帥李國貞荔非元禮於絳州詔以子儀至絳州誅首亂者餘黨頗不安將謀復亂晞選精卒四千以侍其父常持弓警夜不寐者凡七日謀亂者不敢動以功拜殿中監同正廣德二年僕固懷恩誘吐蕃迴紇來寇加晞御史中丞領朔方軍前鋒擊破之其冬懷恩又以吐蕃及迴紇寇邠州陣於

涇北子儀令晞將步兵五千騎五百出西南擊之以兵少相持不戰及暮乘其退半渡擊大破之斬首五千級連戰皆破之

李光弼為河東節度副使知節度事天寶十五載以朔方兵五千會郭子儀軍東下井陘攻收常山郡賊將史思明率眾數萬來援常山光弼擊破之進收藁城等十餘縣南攻趙郡拔之授河北節度使與賊將蔡希德史思明尹子奇戰於常山郡之嘉山大破賊黨斬首萬計

生擒四千思明露髮跣足奔於博陵河北歸順者十餘  
郡是歲玄宗幸蜀肅宗即位於靈武改元至德光弼赴  
行在除戶部尚書北京留守以景城河間之卒五千赴  
太原二年正月賊將史思明蔡希德高秀巖牛庭珣等  
四偽帥衆十餘萬來攻光弼率敢死之士出擊大破之  
斬首七萬餘級軍資器械一皆委棄以功轉檢校司徒  
收清夷橫野等軍擒賊將李弘義以歸拜守司空乾元  
二年為天下兵馬元帥趙王係之副知節度行營事河



北節度支度營田經畧等使與九節度兵圍安慶緒於相  
州史思明自范陽來救屢絕糧道光弼身先士卒苦戰  
勝之思明既殺慶緒即偽位縱兵河南光弼以太尉兼  
侍中代郭子儀為朔方節度兵馬副元帥以東師委之  
光弼至河陽思明於河陽城南築月城掘壕以拒光弼  
賊攻城光弼於中潭城西大破逆黨五千餘斬首千餘  
級生擒五百餘人溺死者大半光弼使將軍李抱玉守  
南城賊帥周摯攻之不下光弼置柵於中潭城外賊捨

南城併力攻中渾光弼連麾三軍俱進聲動天地一鼓而賊大潰斬萬餘級生擒八千餘人軍資器械糧儲數萬計臨陣擒其大將徐璜玉李秦其大將安太清走保懷州思明不知摯等敗尚攻南城光弼悉驅俘囚臨河以示之殺數十人以威之餘衆俱投河赴南岸光弼皆斬之賊既敗走光弼收懷州思明來救迎擊於沁水之上又敗之月餘拔其城生擒安太清周摯楊希文等送於闕下以功進爵臨淮郡王後為河南淮南山南東道

荆南等道副元帥出鎮臨淮史朝儀乘印山之勝寇申  
光等十三州自領精騎圍李岑於宋州光弼徑赴徐州以  
鎮之遣田神功擊敗之浙東賊首袁晁攻剽郡縣浙東  
大亂光弼分兵除討克定江左寶應元年進封臨淮王  
僕固懷恩為左領軍大將軍同正隸安西節度使天寶  
末從郭子儀討高秀巖於雲中破之又敗薛忠義於背  
度山下坑賊七千騎生擒忠義男襲下馬邑郡進軍與  
李光弼合勢及史思明戰于常山趙郡沙河嘉山皆大

破之懷恩功居多肅宗即位於靈武懷恩從子儀赴行在所時同羅部落自西京叛賊北寇朔方子儀與懷恩擊之遂破同羅千餘騎於河上盡收其器械駝馬至德二年正月又從子儀下馮翊河東二郡走偽將崔乾祐子儀既為廣平王元帥之副懷恩領迴紇兵以從之破賊於陝西之新店收兩京皆立殊功以前後功加開府儀同三司鴻臚卿同正負同節度副使封豐國公乾元二年進封大寧郡王朔方行營節度使又從李光弼守

河陽破周摯擒徐璜玉安太清拔懷州皆摧鋒陷敵功  
冠諸將寶應初以同平章事領河東朔方節度行營及  
鎮西迴紇兵馬會于陝州受天下兵馬元師雍王節度  
懷恩賈勇將迴紇兵前驅大破逆賊史朝義於雒陽朝  
義脫身潛遁殺賊十萬東都平遷左僕射兼中書令充  
河北副元帥乃席卷討除兩河諸州先為賊所陷者悉  
平旬日朝義傳首獻于闕下懷恩北拯幽薊所向披靡  
渾瑊初以戰功為中郎將天寶末安祿山反渾瑊從李

光弼討河北郡縣賊將李立節素稱驍勇瑛射殺之特拜右驍衛將軍既而肅宗即位于靈州瑛統兵赴行在次天德軍遇蕃寇侵邊瑛又破之復從郭子儀收京都又圍相州破賊於新鄉改檢校太僕卿充右武鋒使又從僕固懷恩討史朝義戰功居多朝義平加開府儀同三司太常卿興元元年三月瑛為奉天軍行營兵馬副元帥四月與吐蕃首領論莽羅合軍破朱泚偽將韓炤等於武功瑛便赴奉天鳩合諸軍兵馬應李晟收京城

朱泚既竄瑊率兵掩逐至岐陽已東仍令先鋒兵馬追躡至涇州賊將誅泚傳首來獻七月瑊為河中同陝虢等州節度及朔方行營副元帥令討李懷光與賊連戰數百陣貞元元年四月與諸軍大破賊衆降其驍將石崇憲尉遲珪徐庭光等遂收復同州長春宮至八月又與諸將總兵圍河中賊將牛名俊臬懷光首來降

邢君牙為平盧兵馬使天寶末安祿山亂隨節度使侯希逸過海至青徐間田神功之討劉展君牙又從神功

戰伐有功歷將軍試光祿卿神功既為兗鄆節度君牙  
領防秋兵入鎮好時時屬吐蕃陵犯代宗幸陝君牙隸  
屬禁軍扈從後又以戰功加鴻臚卿累封河間郡公建  
中初君牙隸禁軍扈從時河北諸節帥叛換李晟率禁  
軍助馬燧等征之晟以君牙為都虞侯於武安襄國洹  
水魏縣清苑討賊有功君牙擒生斬級居多

曲環天寶末為果毅別將安祿山亂從襄陽節度魯炆  
守鄜州拒賊賊將武令珣戰數十合環功居多超授左



清道率別將兵守澤州破賊驍將安曉特拜羽林將軍  
又將別部兵合諸軍同討史朝義平河北累轉金吾大  
將軍並同正因隨李抱玉移軍京西大厯中領兵隴州  
頻破吐蕃加特進太常卿德宗初嗣位吐蕃大寇劔南  
詔環以幽隴兵五千馳往大破戎虜收七盤城威武及  
維茂二州西戎奔遁環大振功名還加太子賓客賜以  
名馬錦綵又與諸將討涇州叛將劉文喜平之拜開府  
儀同三司兼御史中丞克幽隴兩軍都知兵馬使時李

納擁兵侵逼徐州令環與劉玄佐同救援累破李納逆黨環以功最加御史大夫

衛伯玉為諸衛負外將軍肅宗即位興師靜難伯玉激憤思立功名自安西歸長安初為神策軍兵馬使出鎮陝州行營以功累遷右羽林軍大將軍元年建丑月以破永寧等縣逆賊功進位特進封河東郡公

馬璘為安西裨校累遷至左金吾衛將軍同正至德元年王室多難璘統甲士三千自二庭赴于鳳翔肅宗竒

之委以東討殄寇陝郊破賊河陽皆立殊劾明年蕃戎  
寇邊詔璘赴援河西廣德初僕固懷恩不順誘吐蕃入  
寇代宗避狄陝州璘即日自河右轉鬪戎虜間至於鳳  
翔時蕃軍雲合鳳翔節度孫志直方閉城自守璘乃持  
滿外向突入懸門不解甲背城出戰吐蕃奔潰璘以勁  
騎追擊俘斬數千計血流於野繇是雄名益振代宗還  
宮召慰勞之授兼御史中丞永泰初拜四鎮行營節度  
兼南道和蕃使委之禁旅俾清殘寇俄遷四鎮北庭行

營節度及邠寧節度使兼御史大夫旋加檢校工部尚書以犬戎浸驕歲犯郊境涇州最隣戎虜乃詔璘移鎮涇州兼權知鳳翔隴右節度副使涇原節度涇州刺史四鎮北庭行營節度使如故復以鄭滑二州隸之璘詞氣慷慨以破虜為己任既至涇州分建營伍繕完戰守之具頻破吐蕃以其生口俘馘來獻前後破吐蕃約三萬餘衆

賀蘭進明為河南節度至德二年收高家瑯邪等郡殺

逆賊二萬餘衆

王思禮為關內節度使至德二年從元帥廣平王收西  
京又從司徒郭子儀戰陝城曲沃新店賊軍既敗又於  
絳郡破賊六千餘衆器械山積馬牛十萬餘匹遷兵部  
尚書封崔國公乾元二年於潞城縣東直十嶺擊破史  
思明兵馬使楊是等一萬餘衆

郝廷玉為太尉李光弼帳中愛將乾元中史思明再陷  
雒陽光弼拔東都之師保河陽時三城壁壘不完芻糧

不支旬日賊將安太清等率軍數萬四面急攻光弼懼賊勢西犯河潼極力保孟津以倚其後晝夜嬰城血戰不解將士夷傷光弼召諸將訊之曰賊黨何面難抗或對曰西北隅最為勦敵乃亟召廷玉謂之曰兗渠攻西北者難奈爾為我決勝而還辭曰廷玉所領步卒也願得騎軍五百光弼以精騎三百授之光弼法令嚴峻是日戰不利而還者不解甲斬之廷玉奮命先登流矢雨集馬傷不能軍而退光弼登堞見之駭然曰廷玉奔還

吾事敗矣促令左右取廷玉首來廷玉見使者曰馬中  
毒箭非敗也光弼命易馬而復輕騎衝賊陣馳突數四  
俄而賊黨大敗於河壩廷玉擒賊將徐瑣玉而還繇是賊  
解中澤之圍信宿退去前後以戰功累授開府儀同三  
司試太常卿封安邊郡王

李抱玉為鄭陳潁亳四州節度乾元中從太尉李光弼  
討史思明固河陽復懷州皆功居第一代宗即位擢為  
澤潞節度使加領陳鄭二州廣德元年冬吐蕃寇京師

乘輿幸陝州諸軍潰卒及村間逋客相聚為盜京城南  
面子午等五谷羣盜充斥頗害居人朝廷遣薛景仙領  
兵為五谷招討使連月不捷乃詔抱玉兼鳳翔節度使  
討之抱玉審探知賊帥行止之處先分屯諸谷乃設奇  
潛使輕銳數百南自洋州入攻之賊帥高玉方與諸偷  
會遽為銳卒數十人掩擒之因大捷獲偷黨悉斬之餘  
黨不討自潰旬日內五谷平以功遷司空大歷十年抱  
玉奏大破吐蕃于隴州義寧縣





冊府元龜卷三百五十八